

LIGJI NR. 08/L-115**PËR NDRYSHIMIN DHE PLOTËSIMIN E LIGJIT NR. 04/L-021 PËR AKCIZËN
NË PRODUKTET E DUHANIT****Kuvendi i Republikës së Kosovës,**

Në bazë të nenit 65 (1) të Kushtetutës së Republikës së Kosovës,

Miraton:

**LIGJ PËR NDRYSHIMIN DHE PLOTËSIMIN E LIGJIT NR. 04/L-021 PËR AKCIZËN NË
PRODUKTET E DUHANIT****Neni 1
Qëllimi**

1. Qëllimi i këtij ligji është ndryshimi dhe plotësimi i Ligjit Nr. 04/L-021 për Akcizën në Produktet e Duhanit për ndryshimin e bazës për përlogaritjen e tatimit të akcizës në produktet e duhanit duke përfshirë edhe produktet e reja të duhanit dhe zëvendësuesve të tij sipas njësive matese përkatëse, rritjen e masave mbikëqyrëse, kontrollet doganore, mbajtjen e evidencave, harmonizimin e dispozitave ndëshkimore mbi produktet që i nënshtrohen detyrimeve të akcizës si dhe eliminimin e licencave të dyfishta.

2. Ky Ligj pjesërisht është në përputhje me Direktivën e Këshillit Nr. 2020/262/EU të datës 19 Dhjetor 2019 që përcakton rregullat e përgjithshme të akcizës, Direktivën Parlamentit Evropian dhe të Këshillit Nr. 2014/40/EU të datës 3 Prill 2014 mbi përafrimin e ligjeve, rregulloreve dhe dispozitave administrative të Shteteve Anëtare në lidhje me prodhimin, paraqitjen dhe shitjen e duhanit dhe produkteve të ndërlidhura me to dhe shfuqizimin e Direktivës 2001/37/KE, si dhe Direktivën e Këshillit Nr. 2011/64/EU të datës 21 Qershor 2011 mbi strukturën dhe normat e taksës së akcizës të aplikuara ndaj duhanit të prodhuar.

Neni 2

Neni 3 i Ligjit Bazik, paragrafit 1 i shtohen nënparagrafet e reja me numër 1.13 deri 1.20 me tekstin si në vijim:

1.13. Person fizik që ushtron biznes individual – Çdo person fizik i cili aktivitetin e tij afarist e ushtron si biznes individual, siç përcaktohet me legjisllacionin për shoqëri tregtare.

1.14. Përbërës - nënkupton duhanin, një shtesë, si dhe çdo substancë ose element i pranishëm në një produkt final të duhanit ose produktet e lidhura, përfshirë letrën, filtrin, bojën, kapsulat dhe ngjitësit.

1.15. Duhan për nargjile (shisha)- nënkupton duhanin që konsumohet në formë tymi ose avulli, duke kaluar në një enë/tub uji që përbehet nga një përzierje duhani dhe glicerine, i cili mund të jetë ose jo i aromatizuar, ose i përzier me sheqer frutash ose melasë, ekstrakte etj.

1.16. Duhan me ngrohje - sipas klasifikimit tarifor në TARIK, cilësuar si produkte duhani të riformuara edhe me substanca të tjera, që konsumohet nga një proces ngrohjeje, nëpërmjet një aparati elektronik për ngrohje duhani, sipas klasifikimit tarifor në TARIK, i cili lejon përdoruesin të thithë avujt nga duhani që gjendet në të, pra një produkt duhani,

posaçërisht i krijuar për t'u ngrohur, që përdoret për të çliruar aerosol që përmban nikotinë dhe substanca të tjera, i cili thithet nga përdoruesit nëpërmjet gojës.

1.17. Cigare elektronike - nënkupton një produkt që mund të përdoret për konsum të avullit që përmban nikotinë me anë të një pjese që vendoset pranë gojës ose çdo përbërës tjetër i atij produkti, duke përfshirë një mbajtëse, një depozitë dhe një pajisje pa mbajtëse ose depozitë. Cigaret elektronike mund të jenë njëpërdorimshme, me rimbushje me anë të një ene për rimbushje ose një depozite, ose mund të rimbushen me një mbajtëse njëpërdorimshme.

1.18. Enë rimbushëse - nënkupton një pajisje që mban një lëng-likuid me apo pa përmbajtje nikotine, e cila mund të përdoret për rimbushje të një cigareje elektronike.

1.19. Shije karakteristike - aromatizues - nënkupton një shije apo aromë qartësisht të dallueshme, e ndryshme nga ajo e duhanit si rezultat i përdorimit të një lënde shtesë apo i një kombinimi lëndësh shtesë, duke përfshirë, por pa u kufizuar në: fruta, erëza, barishte, alkool, karamеле, mentol ose vanilje, të cilat janë të kuptueshme para ose gjatë konsumit të produkteve të duhanit.

1.20. Një rrotull duhani - për qëllime të llogaritjes së akcizës, konsiderohen si dy cigare, kur është më e gjatë se tetë (8) cm duke përjashtuar filtrin dhe pipëzën, por jo më e gjatë se njëmbëdhjetë (11) cm, si tre cigare konsiderohet kur është më e gjatë se njëmbëdhjetë (11) cm duke përjashtuar filtrin dhe pipëzën, por jo më e gjatë se katëmbëdhjetë (14) cm, dhe kështu me radhë.

Neni 3

Neni 4 i ligjit bazik, paragrafi 1, ndryshohet me tekstin si në vijim:

1. Baza për llogaritjen e tatimit të akcizës është njësia siç është përcaktuar në vijim:

1.1. për cigare që përmbajnë duhan dhe zëvendësues të duhanit, për njëmijë (1000) copë cigare;

1.2. për puro, cigarillos që përmbajnë duhan apo zëvendësues duhani, për një (1) kilogram neto;

1.3. për ndonjë lloj tjetër të duhanit apo zëvendësues të tij, për një (1) kilogram neto, pavarësisht klasifikimit tarifor sipas TARIK-ut;

1.4. për duhan për nargjile (shisha), për një (1) kilogram neto, ne tërë sasinë e ambalazhuar brenda paketimit;

1.5. për glicerinë që përdoret për prodhimin e produkteve të duhanit dhe zëvendësuesve të tij, për një (1) kilogram neto, pavarësisht klasifikimit tarifor sipas TAK-ut;

1.6. për lëng-likuid me ose pa përmbajtje nikotine, i integruar ne cigare elektronike njëpërdorimshme apo për rimbushje të një cigareje elektronike, për një (1) mililitër të lëngut, ne tërë sasinë e ambalazhuar brenda paketimit, pavarësisht klasifikimit tarifor sipas TARIK-ut;

1.7. për shije karakteristike - aromatizues që përdorën në cigare elektronike apo nargjile, për një (1) mililitër të lëngut, ne tërë sasinë e ambalazhuar brenda paketimit, pavarësisht klasifikimit tarifor sipas TARIK-ut;

1.8. për duhan me ngrohje, për një (1) kilogram neto;

1.9. për produktet e reja të duhanit apo zëvendësues të tij që nuk janë përfshirë më lartë, për një (1) kilogram neto, pavarësisht klasifikimit tarifor sipas TARIK-ut.

Neni 4

Neni 9 i ligjit bazik, paragrafi 1.1 riformulohet si vijon:

1.1. produktet e duhanit të cilat eksportohen në bazë të Autorizimit të lëshuar nga Dogana e Kosovës për shfrytëzimin e procedurave doganore, së bashku më dëshmitë e eksportit.

Neni 5

1. Titulli i Neni 11 të ligjit bazik riformulohet si vijon:

Neni 11

Autorizim për furnizim me banderola me rastin e importit dhe prodhimit të produkteve të duhanit dhe zëvendësuesve të tij

2. Neni 11, paragrafët 1, 2, 3 dhe 5 riformulohen si në vijim:

1. Çdo person që importon, prodhon produkte dhe zëvendësues të duhanit për lëshim në qarkullim të lirë në Republikën e Kosovës, duhet të furnizohet me banderola dhe të posedojë Autorizim sipas paragrafit 2 të këtij neni, me përjashtim të produkteve për shitje për përfaqësitë diplomatike dhe konsullore dhe produkteve të duhanit të importuara në bagazhin privat të udhëtareve sipas dispozitave të Kodit Doganor dhe Akcizave;

2. Autorizimet për furnizim më banderola i lëshon Dogana e Kosovës për subjektet ekonomike që janë të pajisura me Licenca përkatëse nga Ministritë apo Agjencitë sipas ligjeve në fuqi.

3. Ministria e Financave nxjerr akt nënligjor, për caktimin e kushteve dhe procedurës për lëshimin e Autorizimeve.

5. Nëse një person juridik i referuar në paragrafin 1 të këtij neni nuk i përmbahet apo shkel me dashje në mënyrë të përsëritur dispozitat e këtij ligji, Dogana mund t'ia revokoj apo anulojë Autorizimin.

Neni 6

1. Neni 14 i ligjit bazik, paragrafët 1, 2 dhe 4 riformulohen me tekstin si në vijim:

1. Produktet dhe zëvendësuesit e duhanit që importohen apo prodhohen për lëshim në qarkullim të lirë në territorin doganor të Republikës së Kosovës duhet të kenë të vendosura banderola fiskale më mbishkrim "Republika e Kosovës-Ministria e Financave, Punës dhe Transfereve", e cila krahas mbishkrimit duhet të përmbajë shenjat karakteristike, elementet e sigurisë, shkronjat dhe numrin e serisë.

2. Produktet e duhanit dhe zëvendësuesit e duhanit, nga paragrafi 1 i këtij neni, në të cilat banderolat janë vendosur gabimisht apo banderolat janë dëmtuar me paramendim, konsiderohen produkte akcizore për të cilat nuk është llogaritur dhe paguar akciza.

4. Tatimpaguesit e akcizës në produktet e duhanit dhe zëvendësuesit e tij duhet ti vendosin banderolat fiskale në pako për shitje me pakicë nën shtresën e plastifikuar, që është e dukshme dhe e cila dëmtohet me rastin e hapjes së pakos.

2. Neni 14 i ligjit bazik, pas paragrafit 7 shtohen paragrafët 8 dhe 9 me tekstin si në vijim:

8. Përrjashtimisht nga paragrafi 4 i këtij neni, në rastin e produkteve të duhanit të cilat janë në paketim të veçantë ose të pazakontë, banderola e duhanit duhet të vendoset drejtpërdrejt në paketimin origjinal në mënyrë që të jetë e dukshme dhe të mos jetë e mundur të hiqet nga paketimi pa u dëmtuar vetë banderola ose paketimi.

9. Ministria e Financave, Punës dhe Transfereve nxjerr akt nënligjor që përcakton formën, përmbajtjen dhe mënyrën e vendosjes së banderolave fiskale.

Neni 7

Neni 16 ligjit bazik, paragrafi 4 riformulohet si në vijim:

4. Prodhuesit e produkteve të duhanit janë të obliguar që t'i dorëzojnë Doganës raportet mujore mbi stoqet, furnizimet dhe harxhimet e lëndës së parë, përbërësit e përdorur në procesin e prodhimit që marrin pjesë në produktin final sipas normativit të prodhimit si dhe raportet mujore dhe vjetore të prodhimit, shitjes, gjendjen e stoqeve të produkteve finale të duhanit veç e veç dhe pagesat e taksës së akcizës ashtu siç parashihet me Autorizim Doganor.

Neni 8

Nën paragrafit 1.2 i paragrafi 1 të nenit 18 i ligjit bazik fshihet në tërësi.

Neni 9

Neni 19 i ligjit bazik, pas paragrafit 3 shtohet paragrafi 4 me tekstin si në vijim:

4. Importimi dhe prodhimi i duhanit të papërpunuar në fleta, duhanit të grirë refuz, letrës së duhanit-cigareve në formën e broshurave apo të tubave, të filtrit të cigares, glicerinës dhe përbërësve të tjerë që përdoren për prodhimin e produkteve të duhanit apo zëvendësuesve të tij, mund të kryhet vetëm nga personat juridik sipas kushteve si në vijim:

4.1. janë grumbullues-përpunues industrial të duhanit dhe të pajisur me Licenca apo Autorizime sipas legjisllacionit në fuqi;

4.2. posedojnë dhe përdorin linja më cikël të plotë përpunimi dhe paketimi për tregtim të produkteve të duhanit;

4.3. konform dispozitave të Kodit Doganor dhe Akcizave, disponojnë autorizim për Depo të Mallrave Akcizore për qëllime prodhimi.

Neni 10

Neni 20 i ligjit bazik riformulohet me tekstin si në vijim:

1. Subjektet dënohen me gjobë për kundërvajtje për shkeljet e përcaktuara si në vijim:

1.1. nuk llogarit ose llogarit akcizën në kundërshtim me nenin 4 dhe 5 të ligjit bazik;

1.2. vendos në treg produktet e akcizës në kundërshtim me nenin 6 të ligjit bazik;

1.3. nuk paguan akcizën brenda afatit sipas nenit 7 të ligjit bazik;

1.4. paraqet të dhëna të pasakta me qëllim të lirimit nga akciza sipas nenit 9 të ligjit

bazik;

1.5. vendos në treg produktet e akcizës para se të pajiset me autorizim nga Dogana sipas nenit 11 të ligjit bazik;

1.6. transporton produkte të duhanit në kundërshtim me nenin 12 të ligjit bazik;

1.7. nuk mban evidenca për sasi të prodhuara, qarkullimin, stoqet, mallrat në magazine sipas nenit 16 dhe 17 të ligjit bazik;

1.8. nuk raporton dhe nuk e dorëzon deklaratën e akcizës sipas nenit 16 dhe 17 të ligjit bazik;

1.9. vendos në treg produkte të duhanit në të cilat banderolat nuk janë vendosur në mënyrë të përcaktuar me ligj bazik.

2. Për kundërvajtjet nga paragrafi 1 i këtij neni, personi juridik dënohet me gjobë si në vijim:

2.1. Për kundërvajtjet nga nënparagrafi 1.1. deri 1.6 dhe nënparagrafi 1.8 dhe 1.9 të paragrafit 1 të këtij neni, dënohet me gjobë në shumë prej pesëmijë (5000) deri në pesëmbëdhjetë (15,000) euro.

2.2. Për kundërvajtjet nga nënparagrafi 1.7 paragrafit 1 të këtij neni, dënohet me gjobë në shumë prej njëmijë (1000) euro deri në tremijë (3000) euro.

3. Për kundërvajtjet nga paragrafi 1 i këtij neni, personi fizik që ushtron biznes individual dënohet me gjobë si në vijim:

3.1. Për kundërvajtjet nga nënparagrafi 1.1. deri 1.6 dhe nënparagrafi 1.8 dhe 1.9 të paragrafit 1 të këtij neni, dënohet me gjobë në shumë prej tremijë (3000) deri në nëntëmijë (9000) euro.

3.2. Për kundërvajtjet nga nënparagrafi 1.7 paragrafit 1 të këtij neni, dënohet me gjobë në shumë prej njëmijë (1000) euro deri në tremijë (3000) euro.

4. Për kundërvajtjet nga paragrafi 1 i këtij neni personi fizik dhe personi përgjegjës i personit juridik dënohet me gjobë si në vijim:

4.1. Për kundërvajtjet nga nënparagrafi 1.1. deri 1.6 dhe nënparagrafi 1.8 dhe 1.9 të paragrafit 1 të këtij neni, dënohet me gjobë në shumë prej një mijë (1000) euro deri në tremijë (3000) euro.

4.2. Për kundërvajtjet nga nënparagrafi 1.7 paragrafit 1 të këtij neni, dënohet me gjobë në shumë prej pesëqind (500) euro deri në njëmijë e pesëqind (1500) euro.

5. Për kundërvajtjen e përcaktuar në paragrafin 1.9 të këtij neni, përveç gjobës të përcaktuar në paragrafin 2 të këtij neni, personit juridik dhe personit fizik që ushtron biznes individual mund t'i shqiptohet edhe masa mbrojtëse e konfiskimit të produkteve të akcizës.

Neni 11

Pas nenit 23 të ligjit bazik, shtohet neni i ri me titull dhe tekstin si në vijim:

Neni 23 A
Nxjerrja e akteve nënligjore

Aktet nënligjore të parapara me këtë ligj do të nxirren në afat prej një (1) viti nga data e hyrjes në fuqi të këtij ligji.

Neni 12
Hyrja në fuqi

Ky ligj hyn në fuqi pesëmbëdhjetë (15) ditë pas publikimit në Gazetën Zyrtare të Republikës së Kosovës.

Ligji Nr. 08/L-115
22 qershor 2022

Shpallur me dekretin Nr. DL-237/2022, datë 07.07.2022 nga Presidentja e Republikës së Kosovës Vjosa Osmani-Sadriu